


Finanzas publicas, taglias ed instituts bancars

■ Il term «finanzas publicas» submescha la totalitat da las entradas ed expensas dal maun public, vul dir, en noss connex, quellas dal chantun Grischnun e da sias vischnancas. L'organizaziun statala sa fundava avant il 1800 sin ina basa cumplettamain differenta da quella da pli tard: la suveranità finanziaria avevan ils cussegls e las vischnancas e la cassa statala administrava il scrivant da la Lia da la Chadé. Ina contabilitad ordinaria ha existì pir dapi il 1769. Il Stadi n'incassava naginas taglias ordinarias, el n'aveva da l'autra vart era betg da purtar chargias publicas sper ils custs e las diarias dals paucs uffiziants.

Il Grischnun enconuscha (de facto) pir a partir dal 1803 ina pussanza centrala (Regenza), e questa ha pudì sa far valair pir a partir dal 1854 successivamain visavi l'autonomia communal. Ils aderents dal vegl federalissem republican insistivan sin lur anteriurs privilegis ed il particolarissem extrem derasà en la populaziun rurala s'opponiva a tuttas tendenzas centralisticas. Ins refusava al Chantun ils meds finanziarials ch'avessan pudì rinforzar quel. Las entradas chantunales vegnivan dals regals da posta, da sal e da dazi e sche quels na tanschevan betg, vegniva incassada ina taglia cirquitala che correspundeva al dumber da delegads en il Cussegl grond (tudestg Repräsentanzschütz). Cun questas entradas pudeva il Chantun finanziair unicamain las expensas per la milissa chantunala e sustegnair la construcziun da vias. Il pe da taglia (mo sin possess funsil) vegniva fixà mintg'onn dal Cussegl grond. Las inondaziuns dal 1834 avevan adossà al Chantun gronds debits, ma ils Cussegl ed il pievel eran s'opponids a taglias directas generalas ed avevan concedì, sco mesira d'urgenza, mo l'augment da la taglia da consum sin uschenumnads products da luxus.

A partir dal 1848 ha la Confederaziun surpiglià il regal da dazi e da posta, attribuend al chantun Grischnun in'indemnisaziun annuala (minimala). Il Chantun ha era pers tut las taxas internas sin vias, punts e straduns, vul dir la pli lucrativa da las funtaunas d'entradas publicas. Restadas èn sulettamain las taxas sin alcohol. Il pievel ha però refusà il 1848 la taglia sin la facultad e sin l'acquist, il 1850 la taglia sin l'acquist ed il 1853 la lescha revedida davart la taglia sin la facultad e sin l'acquist. L'alternativa pussaivla era sulettamain l'augment da la veglia taglia cirquitala, abolida il 1856 cun l'introducziun d'ina taglia modifitgada sin la facultad e sin l'acquist ed ina taglia per tut ils umens a partir da 17 onns (taglia persunala). Questa taglia chantunala ha introducì il budget statal modern dal Grischnun. Cunquei ch'il Cussegl grond fixava mintg'onn il pe da taglia (mo per egualisar ils deficits), era il budget però suttaimesa a grondas fluctuaziuns e cun il referendum da finanzas aveva il pievel las maestrinas en maun. Ussa pudeva il Chantun sa prestar, almain parzialmain, ina lavur da svilup effizienta, era sche la mancanza notorica da daners na permetteva betg da far gronds pass. Mo en il sector da la construcziun da vias hai dà gronds svilupps, entant che la scola ed il champ social dependevan dad iniziativas privatas e da donaziuns considerablas. Il 1870 è vegnida fundada la Banca Chantunala Grischnuna sco institut che pudeva metter a disposiziun al Chantun ed a l'economia meds finanziarials pli gronds.

A partir dals onns 1890 ha il turissem effectiiv in grond svilup en il Grischnun ch'è alura vegni interrutt andetgmain tras l'Emprima Guerra mundiala. Il svilup ha alura stagnà per mancanza da finanzas ch'ins ha empruvà da cumpensar suenter la guerra cun ina dira taglia sin tut las valurs da facultad e cun ina taglia chantunala sin implants idraulics. Il concurs da las Ovras electricas Grischnunas SA ha però purtà al Chantun ed a las vischnancas perditas en milliuns. Liberà da la taglia èn stads fin il 1945 ina gronda part dal muvel



Expensas da las economias publicas en il chantun Grischnun 1930–2007.

(entir muvel manidel, muvel gross fin 7000 frs, vul dir total ca. 100 miu. frs), il gudogn dals manaschis agriculs (ca. 40 % dals pajataglias) ed il possess da la Baselgia. La chargia fiscal era consequentamain fitg auta per il rest da la populaziun, oravant tut per la classa measauna. Ils meds finanziarials a disposiziun ha stuè impunder il Chantun suenter l'admissiun da l'automobil il 1925 per la renovaziun totala da las vias. Las incumbensas economicas adossadas da la Confederaziun al Grischnun en ils onns da guerra 1939–45 avevan suffà si extremamain l'administraziun chantunala.

Il 1945 èn vegnidas introducidas duas novas taglias: la taglia sin donaziuns e quella sin l'augment da la facultad. Per l'emprima giada è era il gudogn da l'agricultura vegni suttaimesa a la taglia, però mo paucs purs eran sur la limita fixada. L'agricultura e la selvicultura eran (anc) adina fitg impurtantas per la politica statala, per la cassa statala eran ellas però ina chargia. Ils daners perfevgnivan dal turissem sco era da las interpresas industrialas e dal commerzi colliads cun quel. La situaziun finanziaria dal chantun Grischnun n'è dentant betg sa midada essenzialmain a l'entschatta (quint fermamain deficitar). Ina midada positiva è sa manifestada pir cun la conjunctura auta dals onns 1960: il svilup enorm en la branscha turistica e l'occupaziun cumplina en l'industria da construcziun (oravant tut vias ed implants electricis) han prest purtà al Chantun in ferm augment dals meds finanziarials. Entradas fiscalas 1900: 860 000 frs; en ils onns 1930 e 1940 ca. 4,5 miu. frs; 1950 11 miu. frs; 1990 475; 2007 1184. Las expensas èn stadas tranter il 1957 ed il 1987 diesch giadas pli autas, ils custs administrativs (uffizis e persunal) èn creschids da 12 a 187 miu. frs; la forza fiscal è s'augmentada en ils onns da conjunctura auta (1967–85) per trais giadas e mez dapli. Las numerosas incumbensas dal stadi social modern pretendevan adina dapli meds finanziarials. Surtut la furnaziun e scolaziun, ma era il champ social ed il sector da la sanadad èn vegnids promovids e sviluppads a moda nunspetgada. La protecziun da las auas e da l'ambient, la protecziun civila, la planisaziun dal territori, las reconstructuraziuns agriculas e bier auter han effectiiv intervensiuns legislativas en ils spazis da libertad existents. Cun las novas incumbensas ed ils novs uffizis è era creschi il dumber da funcziunaris. Il 1861 sa limitava quel anc a 107 (1940 673), per crescer alura sus-

cessivamain fin il 1990 ad in effectiv da 2403. Entaifer ina perioda da tschuncanta onns èn uschia s'augmentads ils custs da persunal nominalmain per tschient giadas dapli ed il dumber da funcziunaris per trais giadas dapli. Las expensas dal quint d'administraziun ordinari muntavan il 1955 a 55,3 miu. frs, il 1980 gia a 618,2 miu., in augment pia da circa 400 % per persuna. Il 1960 importavan las taglias directas 41 % da tut las entradas, 22 % derivavan da meds federalis (Perequaziun finanziaria, subvenziuns) che stuevan però vegnir transferidas directamain a las vischnancas ed als privats. Il rest sa cumponiva tranter auter d'entradas da gestiun e da tschains e d'entradas bunifitgadas. Il 1980 importavan las contribuziuns federalas mo anc 4,8%, entant che las entradas fiscalas muntavan vinvant a 40%. Las activas e passivas han surpassà en ils onns 1980 il cunfin d'ina miliarda. Las finanzas communalas sa movan en ina dimensiun sumeglianta a quella dal Chantun: il 1955 40 miu. frs, il 1980 625 miu. frs. Intginas vischnancas èn vegnidas ritgas tras concessiuns da dretgs da las auas, autras èn restadas finanzialmain debblas. La lescha davart la perequaziun finanziaria dal 1957 ha purtà ina tscherta egualisaziun, ma era creà dependenzas. Da quella profiteschan surtut vischnancas pitschnas e fitg pitschnas en regions perifericas senza entradas tras implants electricis; l'aut pe da taglia retegna però l'arriv da novs abitants. Il 1981 è vegni introducì la quota da solidaritad da tschains d'aua en favur da las vischnancas finanzialmain debblas. Cumpareglia cun l'index da taglia federal total (100 puncts) era il Grischnun il 1955 cun 153 puncts il chantun cun la pli auta chargia fiscal, il 1965 cun 109 puncts en la media, il 1985 cun 90 puncts cleramain sut ed il 2005 cun 118,8 puncts cleramain sur la media.

Adolf Collenberg

Taglia

Term rumantsch che designescha ina lezia publica e che correspund al tudestg Schnitz. La taglia succedeva en il temp feudal oravant tut sco prestaziun reala u en furma d'in servetsch. Ils cumins e vischnandis da las Trais Lias n'enconuschevan nagina obligaziun fiscal a pro da las singulas Lias respectivamain da la Republica. Quella vegniva alimentada da las entradas da dazis, pensiuns, annatas (p.ex. per dretgs da passadi accordads a truppas estras, recrutaziuns da mercenaris), d'entradas administrativas da las Terras subdi-

tas (il daner da chombra/Camera domini-cale) e da dazis incassads a la fin dal 18avel tschientaner sin l'import da products da luxus. Quellas entradas vegnivan medemamain tagliadas sin las Lias e repartidas da quellas sin lur dretgiras autas e da questas tenor represchentanza sin lur cumins. Ina taglia extraordinaria vegniva medemamain prelevada tenor represchentanza e pudeva vegnir decretada per pajar debits da guerra u per gidar convischins pertugads da catastrofes (lavinias, incendis e.a.). La mediaziun ha surpiglià quel sistem il 1803. La taglia annuala e directa per persunas (taglia sin la facultad e sin l'acquist, taglia virila) è vegnida iniziada pir il 1856 – ina consequenza da l'incassament dals dazis tras la Confederaziun a partir dal 1849. Il princip da la progressiun è vegni introducì il 1881. Fin il 1945 èn stads ils purs (cun paucas excepziuns) deliberads da las taglias sin il gudogn e sin il muvel.

Adolf Collenberg

Bancas

Avant il 1800 n'han betg existì bancas en il Grischnun. Ins produciva sez il bier e pajava en nativalias. Tgi che basegnava daners emprestava quels oravant tut da spediturs a Cuira (Massner, Bavier, Fischer, Dalp e.a.) u da l'aristocrazia e da la signoria locala. En il 18avel/19avel tschientaner accordavan era plaivs e chaplanias credits (p.ex. Morissen).

Il 1808 è vegnida fundada a Cuira ina cassa da spargn che concedeva credits favuraivels. Speculaziuns falladas e la concorrenza tras la Cassa da spargn chantunala, fundada il 1847, han mess ina fin a quella il 1850. L'onn 1862 han spediturs e commerziants da Cuira fundà la Banca per il Grischnun per fatschentas grondas. La Banca commerziala, fundada il 1865 per la clientella pitschna, è vegnida remplazzada il 1870 da la Banca Chantunala Grischnuna (BCG). Ses retgav vegniva impundì a l'entschatta per reglar il quint da las vias e pli tard per finanziair la construcziun da la Viafier retica e da l'Institut da provediment Riòta. La Banca per il Grischnun ha mess en circulaziun atgnas notas fin il 1880, la BCG fin a la fundaziun da la Banca naziunala il 1907.

Enturn il 1900 èn s'engaschadas uschenumnadas bancas da turissem cun sedia en ils centers turistics en la finanziaziun d'hotels e da la viafier: en l'Engiadina la Banca Töndury a S-chanf (ina banca privata fundada il 1856 da Gian Töndury, a partir dal 1888 Banca d'Engiadina J.

Töndury & Cie. a Samedan), a Tavau la Bank für Davos (fundada il 1896, a partir dal 1908 Rhätische Bank). A San Murezzan ha fatg Rudolf Bavier era da banquier en ses Hotel Belvédère (1896–1905), alura ha el vendì quella part a la Banca da San Murezzan.

L'Emprima Guerra mundiala ed ils onns da crisa suandants han influenzà a moda negativa ils affars bancars. Tuttas trais bancas da turissem han stuè capitular: la Banca da San Murezzan è vegnida integrada il 1919 en la Banca populara svizra, la Rhätische Bank il 1930 en la Credit Suisse; la Banca d'Engiadina è vegnida liquidada il 1934. Il medem onn ha la Banca per il Grischnun fatg scussiu ed è vegnida remplazzada il 1935 da la Banca privata grischnuna (fin il 1963). Era la BCG ha gi grevs decennis pervi da ses engaschament en l'hotellaria ed en l'agricultura.

La Cooperativa da credit grischnuna, fundada il 1914 cun agid da la BCG, e la Schweizerische Hotel- Treuhand-Gesellschaft, fundada il 1921 cun subvenziuns federalas, duevan segirar la sopravivenza dals hotels. L'agricultura è vegnida sustegnida a partir dal 1932 oravant tut da la Cassa d'agid per purs (alimentada per part da la BCG). L'economia interna è vegnida promovida a partir dal 1927 da la bursa grischnuna cun sedia a Cuira (commerzi cun palpris da valor e cun martanzia). L'emprima Cassa Raiffeisen dal Grischnun è vegnida fundada il 1910 a Zezras. Quels instituts, organisads sin basa cooperativa, vegnivan manads durant decennis en occupaziun secundara e servivan als basegns da l'agricultura e da la mastergnanza locala.

Adolf Collenberg

Banca Chantunala Grischnuna (BCG)

Fundada il 1870 sco institut da dretg public cun sedia a Cuira, installada l'emprim en la Chasa Grischa, temporarmain en l'uschenumnà Staatsgebäude am Graben, a partir dal 1911 en l'agen edificiu a la Piazza da la Posta. La BCG ha remplazzà la Banca commerziala. Il 1870 ha la cummissiun dal Cussegl grond elegi l'emprim directori da trais commembers per ina durada da trais onns. A partir dal 1970 è in president vegni incaricà cun la surveglianza da la banca ed autorisà da prender decisiuns urgentas. Dapi il 1975 maina ina giunta dal cussegl da banca l'institut bancar e fa la supervisiun. Quest cussegl exista dapi il 1874 e consista da 11 commembers elegids mintgamai per trais onns (fin il 1894 da la cummissiun dal Cussegl grond, alura dal Cussegl grond sez); el controllescha tranter auter il quint annual per mauns dal Cussegl grond, dapi il 1970 per mauns da la Regenza. Tenor ils statuts dal 1970, revedids parzialmain il 1975 ed il 1988, èn las activitads principals limitadas, sco gia dapi il 1870, al territori grischnun. Il 1955 ha la BCG cumenzà a stabilir ina rait d'agenturas e da filialas: il 1970 cumpigliava quella 88, suenter la reorganisaziun dal 1994 100 ed il 2000 92 agenturas e filialas. La BCG è in institut statal cun garanzia statala. Dapi il 1975 emetta ella scrits da participaziun. Davart la repartiziun dal retgav decida dapi il 1998 il cussegl da banca. Persunal: 1970 369; 1980 537 (204 dunnas / 0 en il cader); 1990 694 (296/5); 1995 783 (329/18); 2002 1093 (389/83); 2006 1145 (276/87). Bilantscha 1950 363,2 miu. frs, 1975 2,9 mia.; 2000 11,9 mia. Dapi il 1975 operescha la BCG cun agid da l'elavuraziun electronica da datas.

Adolf Collenberg

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischnuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.